



Putevi postizanja Allahove milosti i oprost (Medina)

Hatib: dr. Ahmed ibn Talib ibn Abdulhamid

2. ševval 1442. po Hidžri / 14. maj 2021.

Svjedočim da nema boga osim Allaha, Milostivog, Svemilosnog, Vladara, Svetog, Onoga Koji je bez nedostataka, Onoga Koji svakoga osigurava, Onoga Koji nad svi bdi, Silnog, Uzvišenog, Gordog, Tvorca, Onoga Koji ni iz čega stvara, Onoga Koji svemu daje oblik, On ima najljepša imena, Njemu pripada najljepši primjer, On govori istinu i On je Uzvišeni i Veliki, i svjedočim da je naš prvak, vjerovjesnik, predvodnik, uzor i radost naših očiju, Muhammed, sallallahu alejhi ve sellem, Allahov rob i poslanik, odabranik među Njegovim stvorenjima i prijatelj, onaj koji otklanja duhovnu nečistoću, koji okuplja ljude, posljednji poslanik, vjerovjesnik pokajanja i milosti, istinoljubivi i povjerljivi, svjedok, donosilac radosnih vijesti i opomene, onaj koji je pozivao Allahu, Njegovom dozvolom, i svjetiljka koja osvjetljava put. On je u Isaovom navještenju Ahmed, a u Tevratu El-Mutevekkil, nije osoran ni grub, ne više i ne galami po pijacama, na zlo ne uzvraća zlom, nego prelazi preko toga i oprašta. Allah je njime otvorio zapečaćena srca, osvijetlio zaslijepljene oči i zaglušene uši. Njegov Gospodar nije ga usmrtio dok njime nije uputio zabludjeli narod da kažu: "La ilahe illallah! – Nema boga osim Allaha!" Dostavio je poslanicu, ispunio povjerenu mu obavezu, savjetovao je ummet i borio se, Allaha radi, onako kako se treba boriti sve dok mu nije došla smrt. Gospodaru, smiluj se, spasi i blagoslovi Muhammeda, čije je svjetlo uputa ljudima, i čija je pojava milost svjetovima, onoliko koliko je bilo Tvojih stvorenja i koliko je ostalo, sretnih i nesretnih, onoliko koliko se ne može obuhvatiti brojem niti ograničiti granicom, trajno i bez kraja, i smiluj se, spasi i blagoslovi njegovu porodicu i ashabe, i neka Ti je hvala na tome.

"Onaj Koji robu Svome objavljuje Kur'an da bi svjetovima bio opomena, Onaj Kome pripada vlast na nebesima i na Zemlji, Koji nema djeteta, Koji u vlasti nema





ortaka i Koji je sve stvorio i kako treba uredio!” (El-Furkan, 1–2) Gospodar vam je propisao post da biste bili bogobožni i dao vam je, iz Svoje dobrote, da dočekate mjesec svakog dobra, spustio je u njemu na vas Svoju milost, olakšao vam činjenje dobrih djela, omogućio vam da slušate Kur’an, ne biste li zaslužili Njegovu milost, neprestano vas obasipao Svojim blagodatima, dobrotom i plemenitošću sve do Dana nagrada (posljednji dan ramazana): “... i da Allaha veličate zato što vam je ukazao na Pravi put, i da zahvalni budete. A kada te robovi Moji za Mene upitaju, Ja sam, sigurno, blizu: odazivam se molbi molitelja kad Me zamoli. Zato neka oni pozivu Mome udovolje i neka vjeruju u Mene, da bi bili na Pravome putu.” (El-Bekara, 185–186)

O vjernici, udijelite od onoga čime vas je Allah opskrbio, “prije nego što dođe Dan kada neće biti ni otkupa, ni prijateljstva, ni posredništva!” (El-Bekara, 254), i znajte da je Allahov Poslanik, sallallahu alejhi ve sellem, propisao zekatul-fitr za svakog slobodnog čovjeka i roba, muškarca i ženu, dijete i odraslu osobu, ako je dočekaio Bajram i posjeduje više od onoga koliko je potrebno za jednodnevnu prehranu svoje porodice, kao vid iskupa za grijehе učinjene u ramazanu, i kao vid prehrane za siromahe. Ako ga izvrši prije bajram-namaza, tretirat će se kao zekatul-fitr, a ako ga izvrši nakon namaza, tretirat će se kao obična sadaka, a dužan ga je izvršiti.

Znajte da primanje i potpunost djela ovise o nijetu, i svakom čovjeku pripada ono što je svojim djelom nanijetio, a da je osnovni kriterij ispravnosti djela i njihove usklađenosti sa Poslanikovom, sallallahu alejhi ve sellem, praksom.

Znajte da je vaša vjera – islam koji pokazujete u javnosti, iman u vašoj nutrini i ihsan – dobročinstvo, kao njen najveći stepen, a ihsan je da obožavaš Allaha kao da Ga vidiš, a ako ne možeš tako, onda sa sviješću da On tebe vidi.

Znajte da se tajna ispravnosti vaših riječi i djela krije u vašim grudima.

Znajte da je vjera ispunjavanje obaveza prema Stvoritelju i stvorenju, i da se zaštita života, časti i imetka postiže vanjskim/formalnim ispoljavanjem islama, a Allahu se račun polaže, i da je Allah lijep i da voli samo ono što je lijepo.





O muslimani, klonite se sumnjivih stvari i onoga što izaziva srdžbu Gospodara, i ostavite ono što vam neće koristiti ni na ovom ni na budućem svijetu, budite dobročinitelji u svemu što radite i bojte se Allaha gdje god budete.

O vjernici, čuvajte Allaha, i On će čuvati vas, molite Ga, i On će vam se odazvati, tražite pomoć od Uzvišenog i Svemogućeg, i znajte da je sve što se događa već određeno, i da je sa strpljenjem pomoć, i da je s nevoljom izlaz, i da je s teškoćom olakšanje i da je onaj ko bude radio šta mu je volja, strgnuo sa sebe ogrtač stida.

O vjernici, učvrstio se u islamu onaj ko povjeruje u Allaha i ustraje, abdesti se i Allaha spomene, obavlja namaz, dijeli svoj imetak na Božijem putu i strpi se, uči Kur'an, slijedi njegove upute i prihvati pouku, i tako upotpuni svoje vjerovanje, napuni vagu svojih dobrih djela, posvjedoči istinu, osvijetli svoje srce i put kojim ide, iskupi svoju dušu i stekne zadovoljstvo svog Gospodara. To su samo vaša djela koja se broje (zapisuju), i za njih ćete polagati račun. Držite se jasnih sunneta, a čuvajte se novotarija, i znajte da je žetva onoga što posiju jezici u Vatri, i budite Allahovi robovi braća.

Znaj, čovječe, da se prijateljstvo, zaštita i naklonost Uzvišenog postižu umiljavanjem Njemu. Radi Njega ostani sam, ostavi sve, suprotstavi se strastima i slijedi Pravi put. Ustrajnost na i Pravom putu je istinska počast i “najprohodniji” put do Blagog i Lijepog. Znaj da je Allah rekao: “O sine Ademov, dokle god Me budeš molio i od Mene se nadao, Ja ću ti praštati šta god budeš radio, i na to se neću obazirati! O sine Ademov, kad bi tvoji grijesi dosegli do neba, pa Me ti zamolio za oprost, oprostio bih ti! O sine Ademov, kad bi mi pristupio s greškama velikim poput Zemlje, zatim Me sreo ne smatrajući drugog Meni ravnim, Ja bih ti pristupio s isto toliko oprosta!”

“O vjernici, bojte se Allaha i budite s onima koji su iskreni!” (Et-Tevba, 119)

Oslonite se na Allaha istinskim osloncem, a kome je teško izvršavati sve Poslanikove upute, neka se drži onih sveobuhvatnih, kao što su njegove riječi: “Neka tvoj jezik bude vlažan od spominjanja Allaha, džellešanuhu.”





“KOLIKO GOD ZNAČAJNA ULOGA HATIBA BILA ZA USPJEH NJEGOVE HUTBE,
NIŠTA MANJE NE ZAOSTAJE NI ODABIR TEME, ODNOSNO MATERIJE
KOJU TOKOM HUTBE ELABORIRA.” (PREPOROD)

HUTBE 

O vjernici, donosite salavate i selame na onoga kome je drveće hrlilo u susret, u čijim je rukama pijesak veličao Allaha, kojem je kamenje nazivalo selam, na čiji se znak raspolutio Mjesec, kojeg je Allah odveo do Sidretul-muntehaa, utješio njegovo srce usmjerivši ga prema kibli koju je on želio, jer Allah ga je blagoslovio, a časno društvo (el-meleul-a’la) salavatom se ukrasilo.

Izvršite Allahovu naredbu i ukrasom meleka se ukasite. Uzvišeni kaže: “Allah i meleki Njegovi blagosiljaju Vjerovjesnika. O vjernici, blagosiljajte ga i vi i šaljte mu pozdrav!” (El-Ahzab, 56)

Allah podario blagoslov meni i vama u časnom Kur’anu, i okoristio mene i vas njegovim ajetima i mudrom opomenom. Rekoh ovo i od Allaha Uzvišenog tražim oprost za sebe, vas i sve muslimane od svakog grijeha, a tražite i vi, On mnogo prašta i milostiv je.

